

焦太史編輯國朝獻徵錄

焦太史編輯國朝獻徵錄卷之三十六目錄

南京禮部一

尚書

王英

張惠

蕭昶

倪謙

李本

黎淳

童軒

謝綬

王宗彝

江淵

朱恩

吳儼

楊廉

章懋

邵寶

沈冬魁

顧清

閔如霖

孫陞

尹臺

林庭機

林士章

姜寶

秦鳴雷

金陵黃應登

全校

吳興茅元儀

錢塘徐象榘

刊行

目錄終

焦太史編輯國朝獻徵錄卷之三十六

南京禮部一

尚書

資善大夫南京禮部尚書謚文安王公英傳

陳敬宗

公諱英字時彥別號泉坡其先太原人祖宗達宋迪  
功郎仕于臨川遂家金谿曾祖順貞元季以書經魁  
江右入國朝退隱于家祖子岱父修本並以儒行稱  
母曾氏公生十一歲而失怙母教之遊邑庠刻苦嗜  
學登永樂甲申進士時太宗文皇帝方銳意育才

命翰林學士解縉選進士穎秀者得如二十八宿之數俾盡讀文淵閣古今書作爲班馬韓柳歐蘇文字命大官日給珍饌月賜燈油之貲數召至便殿問以經史諸子故實或至抵暮方退公在二十八人之中每爲儕輩所推讓後上以綸綍事重以公與今冢宰王直皆慎密可與任並揀入秘閣書進呈機密奏疏歲戊子預修太祖高皇帝實錄丁亥授翰林修撰扈蹕巡狩北京丙申陞翰林侍講戊戌實錄成賜襲衣綵段鈔錠壬寅胡寇犯邊二月上親征公扈從至闕樂兒海五月旋師過威虜鎮李陵城已四十里

上召公曰聞李陵城有石碑可往視之復遣劍灰  
衛官校隨之以行時城中被虜殺掠燒毀一空惟城  
止門有石出尺餘掘土拭磨觀之額曰李陵臺驛令  
謝君德政之碑其文略可讀其陰刻達魯花赤等官  
姓名明日公備奏其故上曰此碑旣鐫有韃靼姓  
名異日胡虜見之必以此地爲已物爾宜再往擊碎  
之用火燬沉之於河以絕其爭端公如旨而往旣還  
奏上喜謂公曰秀才是二十八人讀書者朕需用  
爲用正好宣力勿憚勞苦因問曰朕率師伐虜爾試  
言成功如何公對曰胡寇犯邊罪在不宥但聞天兵

親征必遠走漠北臣願陛下幸毋入險窮追也

上笑曰朕爲天下國家計秀才之言惟不欲窮兵黷武耳復謂曰凡軍中一切動靜或詮言之類爾有所聞卽來密奏又論太監孟驥曰秀才有事卽令入見毋阻六月上駐驛安平鎮立功官軍因有過不與口糧者多相聚悲泣曰吾等糧盡必死道路矣公以爲言且曰此皆壯士也願陛下宥其過而與之恩則異日必得其死力上悅卽命兵部尚書李慶人給口糧并載衣甲驢一疋甲辰上復親征胡虜還次榆木川晏駕時仁宗皇帝在東宮命尚書蹇義夏

原吉學士楊榮楊士奇侍讀王直與公同定喪禮議  
國政宿內閣凡七日 仁宗皇帝嗣位加恩賜白金  
綵段八月進秩侍講學士尋陞右春坊大學士兼翰  
林侍講學士明年乞歸省賜鈔二千緡俾馳傳而還  
宣宗皇帝卽位嘗召人便殿謂曰洪武中學士有  
宋濂吳沈朱善劉三吾永樂初則解綰胡廣俱有重  
名念汝當講經史陳道義以啓沃朕心罔俾前人獨  
專其美賜內醢及鈔千緡命入內閣叅預中秘書奏  
乞分俸養母于家 上允其請宣德庚戌修 太宗

仁宗兩朝實錄成賜白金綵幣製衣陞詹事府少



唐事兼翰林侍講學士復賜金相琥珀麒麟帶壬子  
正月聞太淑人曾氏喪 上命禮部賜祭工部造墳  
遣中官阮童護公奔喪冬十月奪哀還朝寵遇日隆  
不時召對正統間開經筵公爲講官陳說詳明於文  
義外多有規諫語其講章於朝退人爭求去以爲珍  
寶修 宣宗皇帝實錄與少師楊士奇楊榮同爲總  
裁實錄成賜白金百兩綵段鞍馬進秩禮部左侍郎  
兼翰林侍講學士癸亥正月奉旨出理部事講官如  
故乙丑湘江台寧等府民遭疫死甚衆 上遣公齎  
香幣往祀南鎮以禳民病時浙間久旱公至紹興大

雨

雨水深二尺灌獻之夕雨止星見明日又大雨田野  
沾足人皆喜曰此侍郎雨也布政使孫原貞等陪祀  
請作御祭感應記刻石于廟而還丙寅公奏京師去  
冬少雪今年自春徂夏雨澤不降種不入土小民缺  
食此皆臣等政事不修激怒上蒼所致伏望 陛下  
施賑卹之恩臣等宜益省愆戒飭仍乞齋沐祈禱以  
格天心 上從其言果大雨五日先是公奏請致仕  
不許至是年七十復上章乞罷政吏部言公精力未  
衰 上是其言不允戊辰八月 上特旨陞公南京

禮部尚書明日謝恩畢內傳旨曰上以卿久任先朝

多效勤勞陞秩南京俾得安佚既視事南京二年得疾而終是爲景泰元年五月十七日也春秋七十有五訃聞上悼惜賜諡文安命禮部賜祭工部造墳公在翰林屢爲會試考官海內名士多出門下爲文章典贍朝廷制作經其筆居多四方求金石銘誌碑記者接踵其門公酬應不倦詩歌字書人罕能及論曰撫州多名儒顯官若宋之晏殊王安國元之吳澄虞伯生諸君子其文章名位功業皆炳然當世而垂耀竹帛者豈偶然哉玉筍寶蓋諸名山秀氣之所鍾也公亦撫之人也其文章名位功業莫不相似

然自入仕歷官通顯不離 朝廷四十五年而列聖  
眷遇久益不衰於此則似過之矣天之生賢私於撫  
之人哉抑孰知公之才德自足致身於青雲之上也

資善大夫南京禮部尚書東園張公惠傳

黃 瓚

宗伯張公名惠字迪吉號東園山東德州人也家世以農爲業祖考明遠祖妣蕭氏考彥祥妣袁氏公幼聰敏厚重孝親敬長異於羣輩少長拔入郡庠親師取友克勤於學以孝義見稱于人嘗以祖塋去家五里洪武初遭兵燹被圯暴露累年惑於術士未曾修葺時公尚幼永樂十二年中式鄉舉歸卽謂鄉里曰祖墓制榛歲久爲子孫者安忍不修築耶遂不用術士不擇日期以一身任其吉凶冬月跣足披髮如初

喪時授都察院司務陞監察御史南京光祿寺少卿  
進卿陞四川布政使往回故里躬謁宣聖畢必至祖  
塋親操鋤鍤增築墳壠日晡方回親戚隣里就塋所  
一會不於私家宴樂每日飲食皆在墳所亦無桌椅  
就地而食嘗泣而言曰吾祖宗在於地下吾安忍肥  
甘華美爲已樂哉其孝義之誠如此爲司務時本院  
歷事監生八十四名例該三月一考有監生江津等  
賚白銀綵段求考中公喻之曰幼學壯行當以名節  
自勵豈可以賄賂哉津等度不可干寘銀段公家而  
去次早公趨朝具奏各生發口北充吏由是名譽著

妖蛇

異

閩陞陝西道監察御史巡按雲南有御史張善福建人也病於池州公思其病必重乃至察院覩之病果亟矣遂留以視之日晚散步門僕曰此處有妖蛇來時如風聲公曰來時可報我知門僕懼且傷已不報公責之一日報曰來矣公乃挾弓矢出門至堦下望蛇連發數箭箭盡而蛇不下令僕隸取蓆薦於樹下焚之良久蛇墜樹而下聲如倒牆公乃曰官得其人妖不爲害今縣有妖蛇必非良吏也召貴池縣官咎之過沅陵見居民被火延燒數百家皆云有惡鳥銜火公怪卽爲文檄城隍神責之翌日惡鳥死於江是

年六月至雲南有土官巡檢楊琳王貴害衆奏准行  
提不至公巡行至大理府琳等以銀四百兩金八十  
兩來餽公欲擒之謂曰此地曠野恐被劫掠兩不得  
濟汝可送至布政司庶得兩全彼果從命送至安寧  
州又謂曰汝等慇懃遠送可少停待以酒食命隨行  
監生陳勛取廩米三斗與知州董福海辦酒款之至  
二更琳等皆醉遂將原金連人解雲南正其罪黔國  
公沐晟曰此夷害人多矣非公以法誘之豈能得哉  
有土人思任發知賈千戶女色美來騰衝訪之贊以  
銀飾良馬數日令人來娶千戶不從任發留騰衝竊



月不去軍士惡其騷擾聲言千戶誘引外夷爲姻千  
戶懼奏任發搶擄人口侵占中國勅公同三司總兵  
官體勘征勦公曰山險路狹非用兵之所且所爲因  
賈氏女無反情衆從之罷征止委頭目守備要隘民  
皆舉手讚曰吾輩得免征役皆侍御張公之力也所  
屬有黑白五井鹽課司官吏灶丁弊多公皆立法禁  
治人以爲便宜德壬子春巡按浙江東南都會事務  
浩繁持憲者非防閑周密則無根之議興矣公謂欲  
濬其流當潔其源下車卽爲文告于諸廟神祇誓以  
公正清白存心凡察院舊役吏兵館僕盡令易去別

選鄉民之朴實者或直廳事或守門或監獄皆有定約不得相撓越論訴之人俱要正身狀內指陳止告已事毋得泛引囂訟之風十減七八至識大獄人懷疑貳公嘗用利鉤刺血以誓曰如有私心神明是鑑囚徒見者莫不洗心不待考訊自招狀罪當大比公盡心殫慮防禁嚴密懸榜之晨號稱至公其各司所差吏胥董事於府州縣者亦令赴院附簿依期回銷包苴賄賂頓爲衰息又諸司及差來人員多於民間和買貨物公察知之卽令仁和錢塘二縣置簿稽考自是市無和買之害嘗按臨嚴金等郡見其民習僧

尚怪以端午泛舟公出令禁之又杭人信浮圖死喪  
貧者多以火化亦有惑於風水不利經年暴露者公  
甚憫之乃召里老曉諭各令其子孫收葬無主者令  
親故埋瘞不旬日無敢違犯察院中所種蔬果及祭  
胙公薄於自奉必分賜養濟院至於按屬官僚不事  
苛刻甚得大體其有爲人論訴者則依法問擬不容  
少貸公任御史八年適南京都察院奏南京光祿寺  
錢糧出入弊多乞選廉能幹濟官員吏部以公及御  
史郭智推上公陞少卿馳驛赴任時法度廢弛錢糧  
不清公卽奏聞勅內外守備官阮應等到寺盤點以

寺留  
守備  
寺官

虧折數目具奏寺丞董政等百餘人俱發戍甘肅衛  
公整理紀綱禁革宿弊大小不遺又曰欲要正人必  
須潔已自是分毫不染日用飲食俱出于家從西華  
門報進正統三年以母喪去官吏厨役八百人告乞  
保留守備稟城伯李隆奏聞奪情回寺十年給由赴  
京遷本寺卿尋遷四川右布政使貴州苗變總兵官  
龔聚調川兵二萬人協勦遣御史成始終起調公以  
四川偏近諸夷執奏未允適叙州拜子山都蠻亂公  
卽以其兵撫平之十三年夏重慶大旱公甚憂之詢  
知軍民有未葬者八百二十喪不能嫁娶者百餘人

乃解衣帶服飾售錢分給得銀四十七兩於是義工  
感奮爭出金穀助之不數月男女劉時新李氏等咸  
遂婚期而謝紳等八百喪皆舉越三日雨又七日大  
雨是歲有秋公無嗜好朝夕自奉惟蔬飯各一嘗以  
墨菜圓揭座隅期之終身又以寄蕭山魏文靖公文  
靖復以詩有云卓哉同心友爲國遠相遺揭之以司  
戒敢告鬼神知祭酒陳公敬宗亦云張公素心清如  
水澹泊滋味長愛此公自筮仕以至布政二十年大  
臣薦之者十有三疏遣使齎勅召公還京景泰二年  
擢南京禮部尚書數年致仕

南京禮部尚書蕭昶傳

南京禮部尚書蕭昶江西泰和縣人以進士授南京吏部文選主事秩滿陞刑部郎中薦爲雲南按察副使未幾陞雲南右布政使丁憂服闋轉湖廣左布政使天順庚辰入覲以其治行卓異賜宴禮部有裘衣寶鑑之頒辭歸數日召還拜禮部尚書爲人重厚廉靜在方面有時譽及復入朝疎於事體又不長於奏對久之上不悅遂調南京禮部天順五年五月卒遣言諭祭命有司營葬

南京禮部尚書謚文僖倪公謙傳

陳 鎬

倪謙字克讓別號靜存其先浙之錢塘人國朝洪武  
初徙實京師占藉應天之上元生有異質雙目炯然  
如電體有四乳性極穎敏書一經目即記不忘補應  
天府庠生文名大著時初設提學憲臣監察御史彭  
公昂名知人巡歷所至輒舉以勵諸生故就試京師  
者爭求識其面領正統戊午鄉薦賜已未進士及第  
第一甲三人拜翰林院編修入閣中秘書日造詣已  
已奉使朝鮮遠人一睹風采悚然嘆服時有所作即

席揮酒略不經意莫不縮頭吐舌驚以爲神至今國中梓行其文景泰間直文華殿每承顧問有裨時政應制賦詩中官立候以進天順初累遷至學士簡侍憲廟于春官日進講讀多所啓沃己卯主考順天鄉試斥黜權憲之子遂誣構以罪論戍開平在謫四年悠然以詩酒自娛邊人愛慕如奉所親士子及門授經者多所造就至今科第不乏實有功焉憲廟踐祚詔復舊職尋與其子編修岳同日奉命入史局纂修英廟實錄時以爲榮進禮部右侍郎轉南京禮部進本部尚書以疾乞致仕卒贈太子少保諡



文僖勅葬城南新亭鄉之原平生德量寬洪與物無  
競其與人交誠信無偽恒喜獎拔後進不遺故舊博  
覽載藉閤中肆外人莫能及而勤敏嗜學至老不倦  
才識超邁用無不宜惜乎中歷險巇晚登樞要徒以  
文章名海內而經濟之效或若少歉然子孫衣冠之  
盛遂爲南都第一世方以爲盛德之報云所著有玉  
堂稿百卷上谷稿八卷歸田稿四十二卷南宮稿二  
十卷遼海編四卷藏于家

景泰中選內侍之秀異者四五人進學文華殿之側  
室倪謙呂原定敎之上時自臨視命二人講倪講

國風呂講堯典講罷問二人何官因取其牙牌視之  
倪時以左中允兼侍讀呂以右中允兼侍講又問幾  
品皆曰正六品 上曰二官品同安得相兼命取官  
制視之乃命二人以侍講學士兼中允 上旣臨幸  
二人因改坐於旁他日 上至訝之二人對君父所  
坐臣子不敢當 上曰如是乎其後至館中惟立談  
或東西行不復坐云

歷代小史

父子並以文謚並以文集行於世

南京禮部尚書李本傳

李本字立之四川富順縣人正統戊辰進士改翰林院庶吉士歷官檢討編修侍讀預修一統志英廟實錄久之陞南京太常寺少卿禮部侍郎遂陞尚書成化二十一年九月辛丑卒賜祭葬如例本性質直不爲詭異之行然慷慨尚義聞有義舉則欣然倡率爲之其文章平實類其爲人平生不拘小節晚年在禮部頗自縱言官劾其與世浮沉然非定論

南京禮部尚書黎淳

南京禮部尚書黎淳字太樸湖廣華容縣人天順元年舉進士第一授翰林院修撰預修大明一統誌成化二年秩滿陞左春坊左諭德三年英宗實錄成進左庶子十三年修續資治通鑑綱目成遷詹事府少詹事兼翰林院侍讀十四年遷吏部右侍郎二十二年改南京吏部二十三年滿九載遷左侍郎加正二品俸弘治元年陞南京工部尚書尋改禮部又三年以疾得請致仕至五年四月卒年七十賜祭葬如例謚文僖淳性耿介寡與人合患流俗奢侈凡婚喪

燕飲皆有則其取予不苟有門生尹華亭以紅雲布  
寄淳不受卽書封識上曰古之爲令植桑拔茶今之  
爲令織布添花吾不用此妖服也淳剛簡嚴重有大  
臣體臨事議論激而不隨然避遠形跡過於畏慎詩  
文閎博爲時所稱子民牧民表皆舉進士

黎文僖公淳公素儉朴患鄉俗好侈躬自裁抑倡之  
婚葬飲宴之禮人多視以爲則重倫尚節痛違祿養  
極嚴廟祀兄嫂卒其子及女皆幼育爲已子嘗歸省  
至臨清適山東按察副使董國器妻死而董使未還  
特使人舁其柩以歸大常卿余孟亭家貧不能舉

葬公倡同鄉士紳合賻襄其事鄉吏鄧祿寓銀數十兩後祿死藏所寓物候其子長還之所居黃洋渡積潦病涉捐私帑築堤四十丈民到今利焉訓諸生日疊疊不倦登甲科仕中外者相接踵下逮胥吏有舊學者輒優給之後亦多成名云惟公風致若敦朴醇厚長者乃主順天場試事時有試卷奇甚後場不類疑有弊勾稽墨卷得謄錄截卷奸狀按其事而取是卷爲解首則名士馬中錫也其精明又若此

維風編

資政大夫南京禮部尚書致仕贈太子少保童

公軒墓誌銘

倪岳

弘治丁巳秋南京禮部尚書童公秩滿三載以疾弗  
任朝謁具疏懇乞休致上不許至冬復以爲請  
詞益加切乃許之特賜誥追贈其先明年二月十有  
九日以疾卒于所居之第訃聞上悼惜贈太子少  
保賜祭于家者再命工部啓其配陳夫人之窶合葬  
焉公旣卒越四月季夏之望遺腹生子以公治命名  
曰紫芝葬且有期稽勲陳郎中鎬於公世通家乃告  
子必得子銘公墓而後葬惟天順癸未子忝科第公

寔司考校顧以鄉後進在門生之列其敢以不文辭  
公諱軒字士昂姓童氏世爲鄱陽文北鄉樟潭里人  
曾祖元愷妣孫氏祖金友妣章氏考碧瑄號玉壺妣  
章氏陶氏自祖以下皆以公貴贈資政大夫南京禮  
部尚書妣皆夫人童本儒族至玉壺以精天官學永  
樂初召充欽天監天<sup>式</sup>生尋命入文淵閣纂修天文  
諸書皆留于鄱後家南京秦淮之西生公幼穎敏異  
常兒讀書過目成誦玉壺乃召其仲子惠來繼役而  
一意教公俾攻進士業博學篤行文譽日著選充應  
天學生領正統丁卯鄉薦登景泰辛未進士拜南京



吏科給事中公思舉諫職深居簡出不妄與物接嘗  
上疏言省冗員公考察倡武勇擇師儒杜倖進恤京  
民又言南京糴貴民多死請命官賑貸俾御史體察  
多見採納乙亥秩滿三載得賜勅贈封其父母妻如  
制時詔南京守備採辦翠毛魚鮑諸物以萬計公極  
言止之及英廟復辟覽公所奏嘉其敢言尋上疏言  
弭盜安民數事尤切時弊天順戊寅冬劾戶部張尚  
書鳳下獄有詔宥之明年丁嫡母章夫人憂辛巳服  
闋改戶科給事中癸未同考禮部會試精於校閱時  
稱得人甲申 憲廟踐阼公首上疏言帝王之治在

先本而後末隆 聖德用賢才納忠諫愛小民謹邊  
備之謂本而簿書刑名其末也願時引儒臣講求  
祖宗謨範及古帝王修身用人之旨著爲大明一經  
推而行之則 聖德隆命在廷三品大臣歲舉堪任  
方面一人且嚴連坐之法進用大臣亦召三品大臣  
於使殿各舉一人以對俾科道糾其非則賢才用臺  
諫之言賞其直貸其過則忠諫納養民之政在戶部  
凡奏報災傷卽加優恤則小民愛多方求將歷試所  
長文武有犯輸粟于邊則邊備謹 上優詔答曰朕  
覽童某所言有理修德用人納諫朕當自勉餘令諸

司舉行公又言漕河爲官舟所阻請命大臣一人總其事仍乞省貢舟而嚴禁之未幾四川盜作廷議招撫之策謂公才識足任其事乃命公偕刑部朱司務貴奉勅以往公星馳至蜀遍歷賊巢宣布朝廷恩威諭以禍福賊首王應高等後先迎迓兇焰可畏聞公言皆羅拜乞生公召與同飲食示以至誠賊出降者益衆皆慰遣之夏六月進部給事中得便宜行事時賊首趙鐸等尤驍悍不聽撫諭遂復叛去公偕鎮巡三司議分兵剿捕躬冒矢石斬獲無算奏功還朝蜀人爲班師圖以紀之公復言安盜賊有五去貪官

均科差蠲逋負革總部省邊運而盜自息明年夏四  
川巡撫奏賊猖獗遂歸咎于公致公重辟公曰某出  
萬死平賊況有鎮巡三司奏功疏在盍取驗之一言  
不合甘心東市之誅時議出師公曰賊已平奚用出  
師不數日捷奏至矣果然猶坐公免官賴上聖明  
調浙之壽昌知縣已丑述職來朝上疏自埋廷議咸  
以爲寃於是大宗伯姚公舉公學行宜董學政乃擢  
公雲南按察僉事提調雲貴學校公務敦敦本精於  
考校隨才造就士風一變鎮守貴臣咸敬憚焉公復  
上言考察庶官宜廣詢公論作養賢材宜優待學校

於是巡按者交章薦公請加旌擢甲午秋召拜太常寺少卿掌欽天監事公嚴考天文陰陽諸生有搜博訪以爲用公僚屬之薦省歷紙之費夙弊一清累以疾辭不許丁酉冬三載秩滿賜誥賜封其考妣及妻如制己亥夏進太常寺卿仍掌監事敕諭余正己奏言厯法之差上命公與之考論不合公上言歲差置閏其傳已久我朝考厯制象尤爲精密雖日月薄蝕不無先後晷刻之殊分秒多寡之異則以土有南北高下之別耳正己乃謂天地有自然之冬至以至朔望置閏皆非其人力可爲是不知古人以數求天

之術顧以小智亂成式宜下之吏以正其妄從之復  
正天下陰陽官納粟免考之非制壬寅冬三載秩滿  
賜誥有學行端潔之褒贈封其祖考祖妣妣及妻  
皆如制癸卯春以疾乞休許之及歸南京蕭然一室  
不異布衣時有所餽遺非知舊不輕接納縉紳間而  
重之弘治改元戊申會欽天監官以不職罷去衆復  
以公薦命公仍掌監事夏六月日有食之公言日食  
紀元之初當盛夏火旺之候宜正心修身以爲取人  
之本格物窮理以爲燭姦之要進君子退小人以謹  
天戒尋辭掌天文舉吳昊張紳高鍾者以自代是年

冬復以僉舉進都察院右副都御史奉勅提督松潘軍務兼理巡撫時蜀歲荒公至開倉賑貸設粥以食饑餒給糧以歸流移平訟以決久禁先是逾月不雨公至而雨亦沾足公乃爲禁令三十餘事皆安邊保民之政次第舉行復以南路鎮番一帶苦於蠻夷出沒歲減軍糧以備犒賞軍多逃亡公奏以四川官帑銀布代之兵食以足公復以其地險遠蠻夷雜處疏言松茂威疊戍守甚艱而疊溪一路尤甚宜調兵設衛令一都指揮守之四處要路各設一倉以便轉輸令一布政司官督察之復言沿邊衛所州縣皆在萬

山中與蠻夷共之關堡之設有害而無利宜捐松茂之中羊腸一逕之路則關堡倉廩可省兵無遠戍之勞民免艱運之苦蠻夷有坐困之機凡八害三利盡一以聞事下所司議不果行嘗創兵器給諸關堡爲禦敵之具薦雲南按察使林俊可任都憲復上章請老不許辛亥春召還未至擢南京吏部右侍郎癸丑冬疏言臣年六十有九入仕四十年禮宜致仕不許甲寅夏進南京禮部尚書二年三疏懇求致仕皆不許且有操履清慎方切委任之諭公感上知遇前後力陳數千言皆軍國之務其言朝廷大政事關門



一時之議不足以決是非宜如古者公卿大夫各得獻其所議以俟 上裁此最近古而格於制亦不果行丙辰冬夫人陳氏卒時淑人授封者例無葬祭公以爲請詔禮部賜祭于家工部爲塋兆域蓋特恩也及公卒工部復請如公今官之制遣官爲之增修云公生以洪熙乙巳享年七十有四配夫人陳氏無子側室李氏生女一曰靜娥適錦衣舍人黃瑋蔡氏生子一卽紫芝葬以卒之明年月日墓在都城南鳳臺岡之原嗚呼天之賦公質清氣粹平居雍然若不勝衣而強學好問至老不倦蓋公少有奇志讀書爲文

淵博雄麗詩有唐人體裁足以名家書學之精晚亦  
道勁爲時所重性篤孝友旣入仕二親已沒事嫡母  
夫人克盡子職分祿以養兄嫂撫其姪肅以及諸孫  
庶頑輩皆有恩故舊貧乏均爲資給未嘗有關然於  
物一介不苟取至其自奉蔬食飲水泊如也廉勤慎  
密無媿古人而今不可作矣惜哉所著有清風亭藁  
枕肱集海岳涓埃論蜀藁籌邊錄夢徵錄各若干卷  
藏于家

資政大夫南京禮部尚書橋菴謝公綬墓誌銘

林瀚

資政大夫南京禮部尚書謝公以弘治十五年壬戌  
夏五月八日巳卯卒于官予馳奏以聞朝廷特命進  
士某往營葬事部屬郎中李哲翼喪舟以歸江西布  
政司官諭祭于家卹典可謂隆矣其孤琪環衰經奉  
巡撫南畿都察院左副都御史安成彭公彥恭所述  
行狀來請銘拜且泣曰先子於先生爲久交惟茲墓  
石敢託銘之用垂不朽予自公沒後感故舊凋謝恒  
悲不勝握筆輒廢者屢矣公諱綬字維章姓謝氏別

號檣菴始祖惠卿爲臨川內史靈運之裔自樂安洙源遷于龍岡居焉祖永昭初以子貴封南京吏部郎中考諱輔仕至浙藩方伯俱以公貴贈資政大夫南京禮部尚書祖妣袁繼徐妣余先室姜俱贈夫人繼室揭封夫人公自幼器度不凡少長嗜學授春秋得其要領文名日彰景泰癸酉甫弱冠卽舉于鄉明年登進士第拜工部主事治河防於臨清天順戊寅改刑部進員外郎郎中以獄獄公明著聲成化丙戌擢四川右叅議平樂彭寇後當道者薦公領勅督理邊儲而軍餉以充戊子連遭二親喪丁憂于家服闋

廣西適荔浦徭獠起公奉巡撫朱都憲檄率師討之合圍賊巢于桂山岩同事者欲樂屠之收功公力排羣議招來其脇從者歸農全活七八伯人由是叛者相率納款遂請置永安州治之事聞于朝有白金綵幣銀牌羊酒之賜尋陞陝西右叅政屬歲大侵餓孳盈野公廣設方略循行賑濟民用漸甦復於鳳翔通引河流分溉諸縣西民德公樹碑紀績升吾閩按察使風裁凜然振于一方尋進廣西右布政使弘治庚戌轉雲南左布政使在二藩皆以仁厚爲齊民所懷是年擢都察院右副都御史奉勅巡撫湖廣兼贊

軍務時荆王見淵不檢事露詔公覈實竟以嚴正置之於法新建諸王宮殿工費不貲有司皆以空之爲慮公裁處有制事集而民不擾焉苗寇我土官而奪其印公躬督將士擒首惡追還之封境以寧貴州軍儲告乏守臣議欲陸運戶部咨公開商鹽助給公度陸運病民召鹽商期緩乃發工價卽近地糴糧資之遂足湖藩水利及永道郴桂諸州兵備舊無風憲專官公疏增置各一員又嘗請立張橫渠祠于郿修復胡安國祠于衡山其安民生而崇儒術也類如此癸丑擢工部右侍郎乙卯改刑部丙辰遷左侍郎丁巳

拜南京禮部尚書首倡九卿陳政要數事多採納既而上章請老勉留之詎意一疾竟至不起士林咸謂哲人亡矣可勝悼哉公生宣德甲寅享年六十有九

禮部尚書王宗彝傳

禮部尚書王宗彝字表倫直隸東鹿縣人初名倫文之子也嘗鄉試不第 景皇帝以文故欽賜舉人天順初文被法宗彝亦謫戍事白復領鄉薦以成化丙戌進士授戶部主事尋用薦遷郎中督理遼東軍餉後討建州夷以督餉有勞擢太僕少卿久之擢右僉都御史巡撫遼東時建州以方受討疑懼不貢又遼掠朝鮮貢使宗彝謂用兵費且不貲請贖之許令修貢癸卯坐累左遷四川叅議會番夷毀松茂餉路宗彝出彼不意窘以兵俾修復之累遷右副都御史巡



撫陝西人爲兵部右侍郎閱潮河川等路兵馬城池  
尋轉左庚申虜犯大同經略居庸等關晉右都御史  
虜犯遼東以宗彝提督軍務亡何擢南京禮部尚書  
正德丁卯逆瑾用事乃罷歸瑾敗言者屢薦不起正  
德十二年卒如例祭葬諡安簡宗彝儀幹修雍端謹  
重厚所至靡不盡力然不事表操故無赫赫之名

南京禮部尚書江淵

南京禮部尚書江淵字文淵浙江仁和县人成化戊戌進士改翰林院庶吉士除編修修憲廟實錄成陞侍讀充經筵講官乙卯考應天府解試尋充東宮講官與修大明會典考滿進侍讀學士仍與修通鑑纂要再考順天府鄉試上卽位以從龍恩進詹事府少詹事學士如故與修孝廟實錄充講官掌翰林院事尋命爲實錄副總裁陞吏部右侍郎歷左侍郎尋進南京禮部尚書正德四年二月卒訃聞賜祭葬如例淵性孝友謹厚嘗構屋一區俱以遺兄弟舟次聞

有覆舟者亟命刺舟救之果出男婦各一人久居輪  
林位雖尚書尚未柄用而卒故材美無所表見云子  
曉及禪俱進士上第

資善大夫南京禮部尚書慈谿朱公恩墓誌銘

費案

公諱恩字汝承號溪翁其先汴之通許人宋南渡時流寓華亭之七寶鎮四世至士清公貧瘁烏谿里趙氏遂爲烏谿人士清生孟庸封監察御史孟庸生瑄號鈍菴仕至按察副使娶王氏封恭人有丈夫子六公其長也公生而穎異兒時酬對賓客卽有成人志弱冠文舉蔚然傳誦公卿間以成化甲午發解南省登甲辰進士第初授行人奉使得職例當擢臺諫時有追忌鈍菴骨鯁之風者乃不復置公此官遷刑

部員外郎進郎中剛方舉法無所撓於權貴徐緡馬  
都尉張昌平侯家憑寵逾法度莫敢誰何公獨洗磨  
王章持之如一匹夫上因切責二人以伸公法而公  
之望著矣平生好文比居官遜志吏事不通問調出  
入局節門戶有闢門朱郎中之稱至聞於孝皇亦亟  
稱問之馬端肅公時在吏部稔知公擢爲其鄉河南  
按察副使進按察使范文正公子孫在洛中者衰落  
不振公爲覈遺產數千畝立塋戶供洒掃簡其孫賢  
者主祀事加廩祿焉范氏刻石家廟以頌其事中官  
廖堂鎮河南以刺舉刼制長吏而斂其賄遂至貪墨

成風爭營賂以緩禍取容公至盡縛墨吏民賴以安  
廖弟錦衣使者朋昵扇奸梗壞明法人莫能撓惟公  
排之甚力廖溪銜將中傷之以其持身之謹無隙可  
乘竟少輟以從公法時襄毅許公方臥病于家欣慕  
風裁激賞無虛口後襄毅繼馬公爲冢宰念公不衰  
因轉本道布政使部內有鎮利廖以奇羨可自豐籍  
口足國啗當路請開之公抗章擯其議有云金銀鉛  
錫之利人所共趨公私相角其勢必爭往年山東之  
禍實起於此河南切近燕趙聯屬京師其民刁悍少  
慮好任俠爲奸目無公法一某此禍其害不小殆非

數十年財力所能靖安也孰與罷之便其議遂寢河  
洛間得免禍累公之力也尋以資績見推擢南京都  
察院右副都御史巡視江道祖行之日大梁人舉板  
戀塞衛後有負冤者猶思公之不可復云大江東連  
漲海不設關隘海寇出沒人甚苦之公首建更遷之  
令沿江要害置立水寨遠者相去不過五十里墩堞  
相望分地而守互相應援又重立賞格人爭相奮趨  
擒獲之利自是寇患漸息至今著爲成令人猶賴之  
繼遷南少宰進大宗伯公治洛之政防江之略經畫  
已著風采在人才可大受而處南都無事之地人方

望以公輔未幾乃以中官劉瑾誣去劉在徵時坐  
法當死公辨其誣出之劉至正德中遭握竈靈追念  
舊德欲推公要路公不欲近之然其勢方烈亦不敢  
絕之也臺官未明公志劾之以去公弗自辨識者無  
不稱惜公爲政一以安民爲主鋤抑強梗臨事不懼  
然德器故長者樂易可親人亦不甚怨之至其天資  
迅邁見事迎解法家疑擬多待以決宅心仁恕寬獄  
多所平反謝政家居三十年未嘗言及寵辱惟搜剔  
水石樹藝果蔬俯仰游行清淨以樂天年或勸殖貨  
產以道家之忌謝之性友愛篤至四弟早世撫其孤



無異已出諸少賴以成立無凋落者雖貴列三事未  
嘗以勢傲鄉人訓子弟執禮於鄉長老維謹卒于嘉  
靖丙申距生景泰壬申享年八十有五

南京禮部尚書吳儼傳

南京禮部尚書吳儼字克溫常州宜興人成化丁未  
進士選翰林院庶吉士己酉授編脩丙辰同考禮部  
試又充經筵講官 上初出閣兼司經局校書庚申  
陞左春坊左中允辛酉轉南京翰林院侍講學士正  
德丙寅召還纂修 孝廟實錄充經筵日講官兼脩  
玉牒丁卯主考順天府鄉試時逆瑾恃寵招權傾陷  
正直第戒場以爲臣不易命題瑾心已惡之又聞儼  
家巨富陰遣人啗以美官儼峻拒之瑾益慙怒謀藥  
無所得會朝覲考覈外官以不根之語罷之瑾誅起

用仍舊職未幾擢南京禮部右侍郎壬申召還禮部  
乙亥轉左侍郎持節冊封益府丙子陞南京禮部尚  
書丁丑武宗北幸宣大偕府部大臣上疏切諫以  
正德十四年五月卒于位訃聞葬祭如例賜諡文肅  
儼性方嚴操履清慎居鄉有士行閭門亦整肅當官  
臨事期於自立秉經議禮多合古意爲文章莊重簡  
古詩詞清麗可誦

南京禮部尚書贈太子少保謚文恪楊公殿行  
狀

孫存

公諱廉字方震姓楊氏號月湖一號畏軒世家豫章  
之豐城曾祖諱德義祖諱行素累贈南京禮部尚書  
父諱崇號復菴仕終永州知府累贈南京禮部尚書  
母劉氏累贈夫人公幼穎悟絕倫書過目卽了大義  
復菴公嘗學於康齋先生之高弟彭九韶其在桂林  
攜公就學不令作無益詩文與見異端書每令熟讀  
小學大學論孟中庸故公之學得於性理者自家庭  
始長游邑庠人咸器之成化丁酉舉鄉試第一戊戌

下第集室城南授徒講學復菴大書時習二字題其  
堂以示警丙午修縣志成丁未魁會試進士改翰林  
院庶吉士謝病家居庚戌除南京戶科給事中奏行  
後湖查冊法與部參伍籍究根源弊盡革辛亥秋地  
震劾用事大臣薦張元禎吳寬李東陽王鏊劉戩曰  
講大學衍義時論建之兵部議洪武永樂年間黃冊  
公奏彼年黃冊不全暴之天下吏緣爲奸但實查軍  
匠根源冊之祖也乞添造冊庫使稀架薄堆以便揭  
查曬晾制曰可壬子秋上六事一經筵停罷時月令  
講官更直以俟召問二詔用言事諸官不當限科道

拘年月三治蘇浙水患停織造四取恬退林下之人  
曾經薦舉者五刪法司條例六灾異策免大臣未總  
言凡大政宜召大臣面議科道官隨入駁正癸丑夏  
論吏部尚書王恕被誣 朝廷宜斥遠讒邪優禮大  
臣且言公卿中不可無恕冬丁劉夫人憂丙辰復除  
刑科冬上章請祠祀文清公薛瑄及取讀書錄貯國  
學以教諸生刊布天下有旨准行丁巳春上章論經  
筵日講爲格心之學宜以一暴十寒爲戒戊午春改  
南京兵科便迎養復菴公不欲往乃移祿歸養冬兩  
上章論黜陟謂布政使周瑛按察使周孟中僉事王

周程張朱方漢  
理之此也

鴻儒知府張吉知州王雲鳳俱政績有聲宜照天順  
例賜楮幣宴禮部破格陞擢以收才望已未春應詔  
陳四事其二事申明日講衍義刪正條例前議其三  
均節力役謂濟寧沛縣之間宜增立夫版四申明祀  
典謂宋儒周程張朱從祀之位宜居漢唐諸人之上  
夏上章論獄事乞叙復楊茂元盛應期秋西北有警  
陳言邊務三事冬關里災上章謂宜起廟宇一新更  
立木主以革夷教及大成二字譬喻之語於謚法不  
合庚申夏上章乞蚤用周瑛劉元劉大夏謝鐸林俊  
曹璘秋大同有警陳言六事尋陞南京光祿寺少卿

書張天棋監司竹監東家不食筍十二字於屏辛酉  
秋入賀千秋節陳言輔導元良謂 皇太子講讀須  
先大學次論孟而後及中庸尚書屬對作文非帝王  
之學其於格致誠正之功有妨乞於翰林官僚選其  
年齒最少性行端謹者二三人日與 皇太子遊處  
爲傳德保身之助甲子秋主浙江鄉試得人最多丙  
寅再乞休未允丁卯春陞南京太僕少卿己巳春復  
舊君卒赴京領勘合乞致仕吏部以學行奏留辛未  
秋辭服陞南京通政司右通政冬陞順天府尹嘗書  
公移簿曰爾當時每病州縣取民無制不恤民隱每



奏周恂如韓永熙立法之善今當局請看如何又書  
晉陶侃唐劉宴事於壁扁公署後堂曰希包爲文記  
之癸酉咸寧侯仇鉞太監張永都督白玉相繼奉命  
出征車輛銀動以數千兩公以水旱蝗災不派於民  
止借大興遞運所餘銀供之仍奏免派補緩急以濟  
而民莫知爲之者又奏免夏稅一萬七千餘石令農  
民改換者納銀備賑請託亦因以已凡值鄉會二試  
革舖戶和買之害免器皿借辦之擾皆官給之凡徵  
稅則例鄉飲儀節悉加裁定工部題准天下吏農所  
納銀兩類解本部補作正德八年原派物料公速解

補之後清寧宮災遂變初議盡取前銀以給造惟  
順天得免本府收開例等銀一十二萬兩舊復秤過  
轉解公立法銀非五十兩之外不得作二錠類解之  
時但積算見數而已甲戌春應詔極言主上當一於  
主敬以脩人事以弭天變奏入留中各屬歲辦無定  
額公作底簿弊無所容昌平縣歲辦不前奏欲陞州  
轄密雲順義懷柔三縣三縣復奏不堪事下公議乃  
均車輛十分之四於三縣使不致偏重釐各官馬夫  
之銀於均徭使不得多取定陵戶貧富撥補之法使  
不得影射俱著於令乙亥春畫太極圖於府庠北壁

且著太極圖記以迪諸生陞南京禮部右侍郎秋地  
震上章言上下交修之道又論太廟祭祀已卯春上  
章論巡幸署南京工部事繁雜著令官舉要一卷冬  
聖駕幸南京有旨百官並戎服公奏諸臣僚冠服宜  
如朝儀更請謁太廟俱從之自亥至巳凡五乞休俱  
奉溫旨勉留 今上登極用廷臣薦陞南京禮部尚  
書進太學衍義節略上以忠愛答之是歲再乞休雖  
優旨未允眷注方隆而公引年益力 上曰卿才行  
老成譽望素著新政之初方膺委任累疏乞休情辭  
懇切特允所請寫勅給驛還鄉有司月給米三石歲

撥人夫四名應用茲歸其願神保和以茂膺壽考著  
晉樂道以潤色太平公感激泣下歸乃扇其廳曰願  
保堂杜門謝事惟讀書教子而已居官及懸車終日  
手不釋卷嘗聞晦菴劉公語人曰在仕途肯讀書究  
理惟楊方震蔡介夫耳見素林公薦公堪以輔導東  
官舉人劉君教謂公在諫垣章奏剴切南科年來重  
如九鼎大呂以有公也林希元謂公之學門戶自程  
朱淵源自六經權衡百氏低昂漢唐今溪嚴公謂公  
真積實踐而不事文具潛心當世之務而不爲空言  
高吾陳公謂公天分極高雖於書無所不讀然居敬

窮理精思力踐則惟程朱之學爲準故發於詩文因肆辯博充然有餘莊嚴簡勁確乎不惑河東之後惟先生焉間齋汪公謂公爲伊洛之學居敬窮理老而弗懈爲文章必根於六經而多所自得於天下事靡不究心生民利害之源吏治得失之故制禮作樂之要律曆算數之曠具有本末東山劉公謂公詩文非但筆力追古作而議論皆有本源有關名教自當名家皆確論也公天性孝友事親以養志爲孝待弟姪如手足於伯兄寬齋友愛尤篤家居終日萃聚坐話多至夜分祁寒盛暑不輟也雅尚恬靜不逐時好位

升八座淡朴如韋布時素不嗜酒對客亦微醺而罷  
自處雖剛肅望之凜然及至接人則從容和氣無少  
長皆使可親就人在患難中者尤加閔恤癸丑大札  
有舉子旅白下者數病公朝夕往視及不藥具衣棺  
殯斂如禮其子姓世講不忘與人講學旁引曲證務  
令得聖賢指歸初爲詩文出入古名家久之自成機  
軸鄉舉後四書五經之外雖諸子百家無不折衷其  
說而一意程朱之書晝誦夜思至忘寢食少未安反  
復根求必至於是而後已大要以敬爲主直欲體之  
身心而見之行事焉迨尹京兆灾傷洊至民不聊生

人咸爲公難之公左提右挈纖悉畢舉其所罷行不獨可以濟畿內一時之急實可以布之久遠焉者癸酉冬存北上陽明王先生附書抵公稱爲君子有用之學者以此平生著述有月湖稿七卷奏議劄記家規新增伊洛淵源錄先天後天圖學考證太極圖纂要分類程氏遺書外書二程年表西銘劄通呈極經世啓鑰象山語類洪範纂要深衣纂要大學衍義節略一卷類有發明於志道者皇明名臣言行錄皇明理學名臣言行錄各一部皆有補於據德者禮樂書選註風雅源流唐詩詠史絕句白沙定山詩星略算

學發明綴算舉例醫學舉要明醫錄各一卷皆有裨  
於游藝者嘉靖甲申九月存自贛奔先人雙泉君喪  
謁公表墓時已病猶力爲之其表曰有本有末政教  
兼舉又曰惟知正已不爲詭隨其所許者皆所自得  
者也亦徵其雖病而神定矣明年乙酉春正月存復  
有所請公答之刺末自謂病作甚不能作書至亮之  
二字則若筆敗然此殆絕筆也存得之悲公且不作  
矣三月公疾劇寬齋亦病猶問慰不輟迨寬齋卒公  
不食不言者已五日公冢子畋等不令知之忽有聞  
遂淚下痛呼諸子亟往治其喪禮謂吾尚無恙也越



十有三日收等泣請後事乃徐言曰汝輩讀書修行  
毋玷前人沒後恤典自有聖制公論在行狀託孫性  
甫銘表請於羅整菴費鵞湖也言訖而逝距生景泰  
八年八月十一日享年七十有四是日黃霧四塞人  
異之高吾公方巡撫江西與御史秦公鉞具以訃聞  
上悼痛遣工部司務范廷儀管葬命江西布政司  
右叅政馮公訓諭祭二壇贈太子少保謚文恪

南京禮部尚書章懋

黃佐

章懋字德懋金華蘭谿人少遊庠校讀書學問負經濟志略然不自衒露與人交恂恂儒者也天順壬午舉鄉薦以易魁浙士丙戌再至禮部褒然舉首入翰林爲庶吉士丁亥冬除編脩戊子春正月朝廷舉張燈故事命下詞臣詠詩懋謀諸同官黃仲昭莊泉曰國家無事海宇乂安內庭燃燈朝士踏歌傳之往史已非盛事此蘇長公所以有疏而深情其君之不用也今天子仁聖孝奉兩宮將以備耳目之娛極天下之養則斯舉固足以爲樂然而大孝在乎養志

雖舍是亦無有不樂者吾輩盍進諫焉越明日与二人同上章大要以培養聖德爲本上怒左遷懋知臨武縣時修撰羅倫亦以起復元臣言事坐貶時人稱爲翰林四諫會廷臣論救上頻悟命與仲昭俱改南京大理寺評事既至留心職業日取刑書故牘詳閱之遂至精練平反庶獄老吏不如法所當執雖貴卿莫奪也南俸入視北爲縮例益以堂隸願直之贏懋獨無所益二年考績省親予告尋擢福建按察僉事間有番舶銀礦屢爲患懋建議許民與番互市商夷兩便弛銀礦禁聽民採取自是不復盜患遂

息浮稅病民令以海田抵之泰寧寇作梗陽爲清戎  
往掩捕之寇悉就擒沙尤饑盜起開倉賑濟卽時解  
散會與巡察不相得加之行部積勞觸瘴成疾因有  
去志考績至京遂疏求謝事吏部尚書尹旻固留不  
可三詰而終不變乃可之時年四十一至家卽杜門  
足不入城府奉親之外日惟讀書講學甘貧守道若  
將終身詣門請誨者無間遠近常往來楓木庵中學  
者稱曰楓山先生嘉邇將二十年廷臣論薦無虛日  
孝宗勵精圖任儒宿北以謝鐸爲祭酒南以屬懋懋  
方遭父喪力辭詔添設司業虛位以待及終制就官

謹桀度尚德化厲廉恥六館之士翕然向風豪傑有志者排日執經質問所疑隨方而答人人自以爲得師姑蘇尤樾母病據例不得歸省晝夜涕泣懋許之歸或以爲言懋曰吾寧以違制獲罪不忍絕其母子之情也聞者歎服兩疏學政時政等諸宿弊皆不報凡再乞休不允正德改元陳勤 聖學隆繼述謹大婚重詔令敬天戒五事先後五疏乞休又不允居無何引年以請凡三疏始允尋轉南京太常寺卿辭進南京禮部侍郎又辭詔許致仕懋旣退而逆瑾之難作縉紳相繼蒙禍人服其先見當道咸疏懋者儒宿

德詔有司歲時存問以風天下 今上登極詔陞南  
京禮部尚書致仕辭弗允辛巳歲且暮忽構疾親朋  
子姪更迭問候至屬纊語不亂衛守林有年至疾已  
劇臥榻上與論古今天下事甚悉次夕與姪贊論君  
大夫保國保天下之道因及春秋列國名卿推許士  
會父子庶幾歲除令親友各歸守歲嚮晦遂卒年八  
十六是日未旦有星墜所居之前山有司以聞與葬  
祭贈太子太保謚文懿懋曾度夷坦與人言輒露肝  
膽或詐亦不逆億也見人有善不啻在己汲引後進  
惟恐不及居常無甚異同至臨大事決大議是非可

否確乎不拔性寡嗜欲衣服飲食宮室器用隨寓而  
安薄田僅自給不求增益辭受取予出處去就一於  
道義一毫不慊萬鍾弗顧故自入翰林以至入座立  
朝僅四十日官不過三考乞休凡十餘疏難進易退  
當於古人中求之其心常在天下每聞進一善人行  
一善政喜動顏色否則愀然不樂夜必露天焚香默  
以親賢遠姦康國庇民爲禱民生利害輒爲上官言  
之其學以關閩濂洛爲宗本之自得非有傳授亦世  
所間見也於書無所不讀於天下事無不理會要在  
精究而力行之不襲口耳不涉支離故能真見獨到

洞貫道妙其發之議論精實切當多有前賢所未發者嘗謂人心有小大大以窮理小以慎獨謂政體始於格君心收人才固民心格言至論不一而足皆其所獨得者一時同志若羅倫謝鐸莊景陳獻章皆極推許諸人皆蚤世惟懋年踰大耄巍然獨存殆天佑之以壽斯道也然倫嘗立鄉約過嚴則移書責之其盡交誼如此文章不甚求工達意而止或以相諷曰小技爾予弗暇或勸以著述曰儒先之言至矣盡矣又何加焉第刪其繁蕪可也嘗欲摘選程朱後諸儒經書粹語爲集說及刊宋史之繆患力不足而止平



生所著惟蘭谿金華鄉賢祠志及遺訓數卷而已子孫皆天役孫誥不慧年八十一始生子接既膺鄉典上優詔錄接爲國子生先生在閩時歲序却桃符書于門曰正要鬼神司屋漏何須茶壘衛門庭蓋以明志也太宰漁石唐公致政家居時出入惟徒步有陳大叅良模者說之曰翁官居八座年邁七旬故天下大老也孔子曰吾從大夫之後不可徒行翁學孔子者而願欲過之耶公曰固然第吾楓山先師致政歸祇是步行未嘗乘輜乃姪朴菴公名拯侍郎及竹澗潘公希曾侍郎俱守此禮吾安敢違耶

資善大夫南京禮部尚書贈太子少保謚文莊

邵公寶神道碑銘

楊一清

錫山有鉅公家食爲名士仕爲名臣要其終爲名儒  
曰邵公諱寶字國賢者予友西涯李文正公之門人  
也予以西涯故獲好于公久乃益習晚年予謝政公  
歸侍養鎮常郡相比歲時通問訊不絕然制于踪跡  
不及見去年嘉靖丁亥予在朝忽得守臣報則公亡  
矣公世居無錫近慧山傳稱天下第二泉也因號泉  
齋又曰二泉學者稱爲二泉先生文正公成化庚子  
主考南畿得公歸以詫于予曰吾得天下士舉甲辰

進士出知河南許州能以禮讓爲國所舉動多風化  
中事作新廟學諭諸生義利公私之辨及忠孝大節  
聞者感動皆知慎其所自立次教之讀書爲文矩則  
許之文風蔚然改觀正穎考序祠墓改魏文帝廟以  
祠漢愍帝祠范忠宣公于襄城裴晉公于郾城毀龍  
骨杖妖巫尤急民事躬課農種倣朱文公社倉立積  
散法行計口澆田法爲備荒計釐正糧籍民至于今  
稱便徵戶部員外郎尚書委閱章奏進郎中太原周  
文端公華容劉忠宣公甚器重之 孝廟臨御諸公  
奏抑恩倖杜請求釐正度支多公言是用章奏多出

公筆以薦爲江西提學副使至則以身爲教先行檢  
而後辭藝黜浮崇雅士類勃興脩濂溪書院白于巡  
撫林公待用檄取濂溪族孫守祠改建白鹿洞書院  
清學田定課程遠近向慕遷浙江按察使慮獄囚成  
豪惡殺人之獄出可矜疑者若干人正德丁卯遷浙  
江右布政使進湖廣左布政使己巳擢都察院右副  
都御史總督漕運時劉瑾用事公一無所通瑾銜之  
數令人以危言撼之公不爲動乃勒令致仕庚午瑾  
誅起巡撫貴州尋陞戶部右侍郎進左侍郎命兼左  
僉都御史督處糧運及會勘通州城壕歸奏俱稱旨

先是公以母太夫人老自爲藩憲時屢奏乞終養格于例爲侍郎再乞歸養俱不許壬申許歸省賜寶鑑四千緡以行抵家人疏終養始報可得疾尋愈年近六十朝夕侍親側承歡婉愉太夫人安其養年八十餘壽終公養親之暇深居簡出日親書史以著作爲事求請者踵接于門碑版流播遍四方今上嗣極大臣言官交薦公乃有南京禮部尚書之命公疏懇辭上褒以溫旨不奪其志且令有司以禮存問待親終用之比終太夫人之喪天子且召用公而公病不可起矣大父諱鎬父諱溥俱累贈嘉議大夫都

察院右副都御史大母楊氏累贈淑人母柯氏累封  
太淑人進太夫人配顧氏累封淑人生子男二曰德  
孫佛孫俱早卒今以族弟之子煦爲嗣公居鄉厚隣  
睦族好爲義舉里人薰而善良顧自公視之皆常行  
不及書文辭典重刊落華藻一歸于純厚詩歌出入  
李杜間樂府有漢魏遺意所著學史簡端二錄爲都  
憲吳公獻臣錄進他如定性書說漕政舉要錄容春  
堂勿藥諸集各若干卷藏于家其厄于火者莫得而  
詳也公生天順庚辰卒于嘉靖丁亥壽六十有八訃  
聞贈太子少保賜諡文莊諭祭營葬公平生操履端  
缺徵錄

飭自登第至侍養家居一切餽遺不苟受篋中無長物唯圖書金石遺文而已公于家稱孝子于國稱名臣于世稱純儒傑然爲天地間完德君子公性度端雅貞介夙成臨事猶講學未嘗疾言遽色人或數百語不能終公以數語卽竟之嘗曰願爲真士夫不爲假道學于聲色貨利絕口不言惟賢人君子則敬之弗棄一時碩儒並以天下士稱之而憲臣有言于朝曰行追古人學方國士

資德大夫正治上卿南京禮部尚書立齋沈公

冬魁墓誌銘

李時

南京禮部尚書沈公歿予謬司秩宗嘆曰傷哉典刑凋落鄉邦之戚也乃爲具疏陳故尚書全節而終者與祭葬如制上優許之已而其子汝蘭持狀謁予泣而言曰微先生孰圖吾先君不朽者敢以誌銘請予與公旣同鄉同朝又雅辱公愛誼不可辭乃志而銘之志曰公諱冬魁字伯貞號立齋又號漳涯其先吳興人也始肇迹河間則曰景先曰泉者公祖父父也皆貴贈資政大夫南京禮部尚書大母趙母陸皆



夫人蚤舉順天繼第進士授中書舍人歷積勲員外郎郎中擢順天府丞起艱太常少卿轉光祿太常卿左副都御史巡視河南入爲工部右侍郎總理易州山廠尋改戶部避例復爲工部遷南京禮部尚書居五年致政 今上嘉重之錫月廩歲役表名德優易退也於戲今沒矣年視耆靳三耳不忝考終矣公生穎特甫澡髮人見者業以非常目之而六歲卽能讀父書屬對應聲時時作警語衆咸異其給而能奇也隨父省墓歸安年始十一凡道所經歷山水形勝州邑名里略能憶誦之父喜曰兒能若是辨乎乃使就

學鄉先生鄉先生大加珍器其在弟子羣課業程益  
弟子羣皆畏讓之未及舉而父卒悲恚泣曰兒而不  
能及父存就一舉邪益感憤進業其樹志如此中書  
操觚執槩間相故刀筆育之公獨以才望稱人不謂  
以字進也公爲中書母陸在都下所以致悅陸夫人  
者左右甚備纂修會典及孝廟實錄成俱預有勞其  
爲光祿貶裁浮靡供億有藝疏節省事宜中弊反經  
上日光祿卿議是其聽裁損焉其巡撫河南至則  
先條列所欲興革摘示之河南榜示無不帖伏以爲  
真都御史云指揮石姓者素豪挾貲倚權璫爲暴公

發其奸并劾權璫中右權璫加旨詰責甚峻公曰都御史固知有法終不阿中旨脫有罪督捕嵩盧盜盡平之捕郾城盜又平之詔曰文事有武備者乃見有沈冬魁其賜金帛若干濠庶人煽逆西江變告公防禦繕績尤悉中州無恐雖不遇變而策略預遠矣易州故利府多豪猾中官乾沒漏削侍郎至不得有所詰問或操繩約急輒訕構橫發公曰豈有爲天子操法明利復能顧刺譏者也竟滌理之舊常虧公帑賄內貴積以爲然公罷之自是出入羸縮廢私故稱視山厥廉正者有沈侍郎滿九載考加俸二級勅吏部

記其助於是 天子知公方嚮用之不欲煩以錢穀  
乃拜南都之命公已絕意仕宦嘆曰吾年望懸與乃  
復顧戀不能引決七尺軀哉乙酉疏乞休丙戌又疏  
丁亥又再疏故遂不大用家居益產圻示坦時出俸  
金供具廷戚舊坐花行酒賦詩鼓琴瑟甚歡鄉人忘  
其爲禮部尚書云性孝友執喪中禮家故有產業城  
東南門內盡舉以與弟無分也恂恂夷雅見者咸慕  
悅之至秉權蒞事卓哉莫可謗奪蓋其天性然沒前  
數日自制年譜屬于後事吁可謂定矣

南京禮部尚書謚文僖顧公清墓誌銘

孫承恩

公諱清字士廉別號東江學者稱爲東江先生世居  
於華亭城南古西湖之浹曾祖文理祖顯父瓊皆隱  
德不仕後以公貴祖父俱贈禮部右侍郎祖妣沈妣  
陸俱贈淑人公生而穎異九歲受小學過目成誦年  
十五謁張莊簡公公以元老負重望卽衣冠出見退  
語人曰大器也弱冠遊縣庠與錢太史鶴灘先生福  
沈惟馨先生悅交最厚誓志於學鑽研討論廣聞羣  
籍而業日進三人者藝皆頡頏而公獨以沉實勝識

者占其遠到尤爲督學司馬公堊所器重每期以公  
輔家本儒素值歲侵有常情所不堪者而公安貧困  
守有富家欲結納公公書座右曰毋徇物而爲所溺  
毋狎物而爲所乘自少立志已如此四試不利不少  
劉弘治壬子吳郡王文恪公主南畿試事聞公文曰  
昔歐陽子謂當讓蘇子瞻一頭地斯人也我固當讓  
矣遂薦爲第一與論允愜明年癸丑長沙李文正公  
主會試公名第二廷試吳文肅公爲掌卷官或欲導  
公往見公辭曰昔人所謂呈身者吾媿之竟不往洎  
吳得公卷極力贊美以九重字失提寘二甲第一人

改翰林庶吉士讀書中秘每試必在甲乙公與同年  
毛文簡公澄羅文莊公欽順汪宗伯俊四人每以名  
節自砥礪授編修與修大明會典丙辰巳未連同考  
會試稱得人戊午秋滿進文林郎封父爲編修母陸  
張俱爲孺人癸亥正月丁內艱三月以會典成進侍  
讀正德初還朝與修孝廟實錄書妖人李孜省事  
焦公芳與彭文思公隙欲誣其附以得進貽公以風  
聞書公云據實直書史職也他不敢與聞焦不能敗  
中官蔣琮誣遂臺諫涉歷既久章疏雜沓時逆瑾方  
熾愈畏觸其黨莫敢涉筆公潛披精核盡載其實有

詭而欲節畧者公不爲動丁卯主南畿鄉試尋充經筵講官前後進講義必稽古兼規諷時政辭旨剴直多所裨益逆瑾竊柄朝士多屈意與交公抗不爲禮鄉人張文冕用事附和者皆至美官公絕不與通有言公肯枉一刺卽高位可致公叱曰吾足可輕動乎且吾但知做吾官而已遑知其他戊辰十月丁外艱已巳五月實錄成例當進秩瑾銜諸翰林素不加禮因矯詔追論會典事以不諳政事爲名降編修尋調南京兵部車駕司員外會憂不起庚午八月瑾誅還侍讀辛未五月陞侍讀學士兼修玉牒甲戌主武舉



考試乙亥掌院詔同內閣輔臣照例考察上疏辭免  
不允九月有文綺之賜丙子四月秩滿進奉直大夫  
加贈父爲侍讀學士母陸爲宜人尋陞詹事府少詹  
事兼翰林院學士充經筵日講官丁丑主考會試防  
範嚴肅校文崇雅黜浮得士爲盛奉命教庶吉士陶  
鎔造就一時出門下者若江右舒芬南廣倫以訓建  
康陳沂貴溪汪佃西安許宗魯關中馬文簡汝驥至  
今稱爲一代名流又嘗教內書堂不結生徒不使與  
子弟相接嘗曰此輩如穢物遠之猶恐其汙況近之  
也餘姚謝文正公每稱其臨事有守以此時儲位尚

虛公疏請預定不報武宗數巡幸公屢疏請回鑾言  
甚切是歲六月陞禮部右侍郎與宗伯毛文簡公協  
心秉政會郊祀且迫而駕猶未還公草疏數百言上  
之上亦爲感動秩滿進階通議大夫贈及再世如其  
官蔭一孫入監讀書時宸濠旣獲武宗駐蹕通州江  
彬在側人情洶洶內閣會議疏請班師辛巳武宗崩  
今 上入繼大統復命議迎駕冊立勸進頒詔易服  
臨喪諸吉凶大禮公援古證今折衷羣言時以公所  
議爲得體從公居多公時譽望日起僉謂旦夕爰立  
而有忌公欲傾之者嗾臺諫撫他人事誣公不根特

甚衆論囂然內閣亦持之不下而公從容鎮靜因詔  
例自引退無少濡滯一時皆爲公不平王文恪公方  
家居因作風聞論以雪之論一出而輿論益定於是  
南北臺諫程英朱光等四十餘人并撫按各上章論  
薦上乃起公南京禮部右侍郎公旣歸自喜甚適  
絕意仕進不謂復有簡命不得已之任兩疏乞歸不  
允時望方屬公漸次柄用而公歸志已決疏益懇是  
秋得俞旨有歷事先朝講讀年久多劬勤勞旣病篤  
懇辭陞南京禮部尚書致仕先是公以進徽號賀表  
上京師至東昌聞命有勸公謀以代進者公曰清被

皇上渥恩得遂私請今一事不終豈人臣之義乎  
時已力疾猶云縱不能覲天顏得一拜闕門爲幸乃  
抵德州與疾而進卒於河間府瀛海驛戊子閏十月  
二十九日也公疾革時知府牛天麟問以家事曰無  
以問也吾表安在謹護之牛深嘆其忠勤始終敬畏  
不亂公之出處之槩如此自少至老與人一以誠論  
事侃侃不少貶非其人不與言可與言惟恐不盡已  
意至立朝當事王章國體鑿鑿具有根據若所著廟  
制服制私議諸皆可類推平生事皆實歷其言雖數  
十年不變一字凡事精思斂到卽始要終如指諸掌

也恬於進取以退步爲消謫忌長策不因遲速動意  
最受知李文正公間嘗表於公曰清在門下惟當退  
一步文正悵然曰誰肯道此初轉學士有沮之者梁  
文康公曰他人且及渠已後若更遲之如公論何後  
五年學士而亦漠然故文正有始知衣鉢是家風之  
句蓋其高情雅致不汲汲於顯貴至於厲被誣謗危  
禍且及而亦不動心其量度過人遠矣嘗謂人曰人  
看聖賢太高故畏而不敢爲然本無異要在自立耳  
又言人便亨達終不可失了秀才氣味習勤事事必  
終勤之少逸卽怫然曰事畢乃逸舍而求閒祇益忙

耳先是公嘗戒子曰吾無補於時卽死慎毋陳乞恤  
與以重吾過于奉命惟謹公卒之三年督學章公哀  
并巡按魏公有本從庠校羣議奉公入祀鄉賢復疏  
聞於朝下部議得俞旨賜葬如制謚文僖恩禮渥矣

南京禮部尚書午塘閔公如霖行狀 袁煒

公諱如霖字師望午塘其號也公之先爲汴人宋寧  
慶中有將仕郎某者避兵亂徙家烏程之晟舍里將  
仕三傳而爲遜遜生性性生綬綬以孫莊懿公貴贈  
官保刑部尚書生壽官復公曾祖也壽官生理理生  
惠惠生公理惠皆以公貴贈禮部侍郎妣皆贈淑人  
初公考贅於沈生公七年沒沈淑人亦相繼謝世舅  
氏利公貴謀害之賓毒飲中公覺幸不死乃盡棄獨  
跳身歸閔依從父檢校君片檢校使受詩塾師所據  
經訓微指迎意輒解師謝不能教而去已而補郡庠

弟子員較於有司輒占高等嘉靖戊子舉於鄉壬辰  
登進士第改庶吉士甲午授翰林院編修丙辰奉

詔充經筵展書官校錄御文并修宋史以大慶齋御  
書使宗藩諸藩饋遺悉卻不受戊戌爲會試同考官  
尋陞右春坊右中允兼翰林院修撰癸卯主應天鄉  
試甲辰復主武舉試事乙巳以校錄御文并修宋史  
書成陞左春坊左諭德復奉 詔纂修會典無何請

告去告滿再起遷翰林院侍讀學士尋陞太常寺卿  
掌國子監祭酒事壬子拜禮部右侍郎轉左癸丑裕  
景二府婚禮成 上嘉勞賜表裏紗錠是年 上



天下進士若干人爲庶吉士特命公以侍郎兼翰林院學士往主教事明年改吏部左侍郎掌詹事府供內撰文優眷方篤俄以牋疏微註免撰文公小心益恭上意亦釋丙辰陞南京禮部尚書明年公上疏自陳乞罷甚力有詔許致仕歸蓋歸踰年而後卒人莫不稱完節云公寬大溫博與人交不爲畛域然亦未嘗苟同於人歷官清華不一踐繁劇而遇事能斷在廷諸老往往以疑事質之二府婚禮時尚書歐陽公方贊直右侍孫公奉使在外公獨與其事斟酌損益咸當上心三典文衡較閱精審其所獎拔往往在

文藝尺幅之外應天既啟轅有在生某者詣公自言  
公令誦其文誦未畢公抽所落卷示之譏彈甚悉其  
人媿服而去掌國學主於嚴身率物不爲苛細六館  
之士至今德之及教庶吉士嘗曰朝廷任我重矣不  
及時與諸君子商論國家大故使知輔養所急顧今  
雕鏤文字相夸示爲工邪故是科最號得人留者皆  
名士云

資善大夫南京禮部尚書季泉孫公陞行狀

李本

南大宗伯季泉孫公者忠烈公之季子也其先蓋睦州人後唐明宗時三司使諱岳者史稱廉吏卒葬餘姚燭湖之北麓子孫因家焉傳七世至應時宋淳熙乙未進士通判邵武軍倡道東南學者稱燭湖先生從祀孔子廟而燭湖孫氏遂著又五世至原彝爲山陰教諭原彝生銳公高祖也以長子泓貴封監察御史曾祖溥祖新皆以忠烈公推恩贈禮部尚書曾祖妣祖妣皆夫人忠烈公配楊夫人生三子伯堪都督

同知以孝旌仲堦尚寶司卿季則公也諱陞字志高  
生而穎異髫髻卽嗜書日記數千言讀史至名賢傳  
輒以自期尤喜爲古文詞年十六補邑庠弟子時伯  
仲兩兄旣入高等皆十年以長而公名與頡頏正德  
己卯忠烈公撫江右死逆濠之變兄弟聞訃誓死赴  
難廬墓茹素語在伯子旌孝集中御史韓君聞忠烈  
公三子賢一見禮重之尤獨奇公以爲年少而才面  
試越王臺弔古文公頃刻立就數百言韓君語人曰  
此可與唐人滕王閣序並稱而孫季子之名動浙中  
矣嘉靖乙酉領鄉薦丁亥遊太學大司成今少師分

宜嚴公及上海陸公兩試皆首選而孫季子之名動  
京師時伯子官錦衣迎母夫人來就養公依焉京師  
士從遊者甚衆乙未舉進士當大廷之對進仁禮保  
邦之說上親爲批定賜以第二人及第授翰林院  
編修初丙戌伯子舉武科第一至是人以文武及第  
爲忠烈公之報云公性資純粹持重謹畏擇地而蹈  
日一食如書生絕不與他曹事見者皆指爲公輔之  
器公嘗與修列聖御文五經二十一史乙巳晉右春  
坊中允嘗與修大明會典清理軍職貼黃丙午主南  
畿試事公諳於當世之故諸所供事不爲曉曉辨而

思致獨遠攷覈必精同事者以公可否占得失退戚  
笑服族時詞林爲會分韻倡和公多首或和多先  
成衆隨響應詞采盈卷內江趙君贈公詩有季子文  
章伯王孫忠孝家之句時以爲知言已西晉大司成  
力以師道自任教先器識嘗念諸生性逸難制宜懸  
格使不犯乃署爲二十二條執行之雖親貴關說弗  
聽至遇貧喪出粟爲助人咸德之辛亥晉春官少宗  
伯上崇輿右文視禮言於列曹加等今少傅華亭徐  
公爲大宗伯而公左右之事咸得當嘗請行格景府  
冠讀禮從之壬子 上命之舊邸所建元佑宮安神

祭告重孝思也公奉使惟謹有司以大臣特命乘傳  
供治甚具公曰茲非赤子膏血乎悉揮去懽聲徹數  
千里襄鄧間黃河之役民多菜色道遇荷鋤者停輿  
問疾苦因述爲古詩數章遺守臣守臣亟下賑恤之  
令御史績溪胡君爲鐫詩于石曰仁人之言利自溥  
也癸丑竣事還改天官少宰無何以毋憂去伯子又  
道喪公歸二喪執禮如喪忠烈公時廬墓茹素足跡  
不履城市人罕覩其面撫按薦疏踵至丙辰徵爲少  
宗伯旋改少宰公樂道人善察可用卽以白太宰不  
欲其人知也視金帛雖毫末若將浼已人素信之故

前後在銓曹無敢有私入一物私干一事者丁巳晉  
今職公之南京跡稍遠而名益著崇敦朴之教先躬  
行之化疏陳較術業數事祛積弊南曹因簡逸無大  
艱務而公復肆力於著作薦紳大夫南來者咸述公  
之德履誦公之文章以爲國家典刑後進楷範庚申  
六月二十日病卒聞者無不流涕于鑑等疏請賜卹  
如制公全德富學平生鮮過蓋纖無可議師事伯兄  
無巨細必稟命而行生必侍側母夫八及伯仲兩兄  
逝誠勿治家慶嘗爲生日詩有曰楚水終天元抱恨  
潘輿往事又成空蓋念念不忘親也自少至晚敬慎



如一日視屋漏如明庭對妻孥如大賓教諸子以身  
爲訓嘗曰士立身務名節忠義立朝務正直忠厚毋  
忘先烈毋墮家聲乃吾子也故諸子仕未仕讀書外  
無他念若不知家人生殖計者孫氏雖宦族而忠烈  
公以清白遺家獨貧公衣哺食淡一無所欲功名之  
際每退讓不敢居交遊海內簡直寡合非其人不得  
親然寔能容絕口不談人短又重義好施貧賤之交  
後多賴公者同年翰撰韓君早卒公爲理後事撫嗣  
子最厚嘗白於當事立坊著名以畢其志與華州王  
君友善王君以地震卒公聞之太慟亟收其遺文叙

以傳王稿多訛夫惟公得其真能辨之古曰施恩於  
不報公心行多類此公於六籍百家金石竹簡之傳  
靡不究心爲文典實有體法兩漢詩宗漢魏其爲近  
體法盛唐尤宗杜氏今傳詩文二千卷嗟夫德足風  
世言能明志公之死而不朽者其在茲哉距生弘治  
辛酉三月二十六日得年六十配韓氏贈夫人繼楊  
氏封夫人子男五長卽鑣丙辰進士今任兵部職方  
司員外郎次卽鑣癸丑進士今任翰林院編修次鈞  
戊午舉人次鑣官工次鑣尚幼

宗伯尹洞山先生臺傳

胡直

洞山先生尹氏諱臺字崇基吉永新人也其取號以居左有石山空洞故咸稱洞山先生云母劉太淑人夢神人餽美珠白粲始有姪大父夢神登中堂而生五歲受小學誦至立身行道揚名于後世語作而指曰至言也聞者異之甫亂侍父少宰公某司訓吳縣業已慕故相王文恪尚書劉鐵柯二公心自負束髮又隨往潛嘉靖元年公卒于潛哭幾不生居喪如禮以孝聞戊子舉鄉書明年入南雍名震白門乙未登第肅皇帝御覽子大夫列十二卷者命與一甲並

梓行世改庶吉士讀中祕書故相顧文康張文忠二  
公屢簡先生文與內江趙公更相雄稱二雋云費文  
憲公再秉國高先生名欲致見竟不可武定侯郭勛  
怙寵驕恣先生屢弗下之勛忿欲中以它事文康爲  
力解諷令造謝亦竟不可丁酉授編脩乙亥奉命往  
諭楚諸侯王未入境先檄長史司罷一切饋餉及覲  
先生儀節迄不敢言饋事使竣登衡嶽窺金簡上祝  
融慨然思禹功而詠歌之追尋朱張軼步割俸建二  
賢祠辛丑充會試同考試官癸卯請乞終養三年劉  
太淑人卽世又哭幾不生旣襄事猶粥食大宰鄒

大司成兩文莊宮贊羅文恭數勸勿減性始肉戊申  
除舊官乙酉同修大明會典庚戌復充會試同考試  
官策問及重臣權臣 上覽亟取臣鑒錄賢姦傳省  
覽爲之感動繇是稔先生名一時上下有延頸相天  
下之望而不相能者進譏輔臣嚴嵩曰權臣蓋指公  
也嵩陽答以好言而中心怨次骨矣國子缺司業序  
得遷會趙公新起復橐裝罄先生旣分俸助又訟於  
嵩曰趙寔甚司業有衙舍馬皂願先趙嵩笑曰是當  
成君之美未幾趙坐封事謫先生以春坊中允管國  
子司業督六館生首在端習所獎拔多爲名士辛亥

以舊官兼翰林修撰回坊專理誥勅先生曰是所謂  
代天言也故其言務古雅不為偶麗咸寧侯仇鸞新  
柄兵請互市陰實憚虜欲以款之鸞知先生言泄執  
政所入朝裂眦而視弗顧也明年承命主南京鄉試  
策陳祖宗馭將制兵甚備先生謂同事郭公鑒曰有  
如上怒逮君柰何郭曰卽有是固所願也先生壯之  
進卮酒會鸞先伏逆誅錄入 上覽摘策中數事密  
問嵩嵩方欲求婚好因善爲對乃令庶臣世蕃介劉  
某置酒蹴席致求婚語先生竟確辭之以是怨日深  
癸丑冬陞右春坊右諭德兼翰林院侍講管坊事明

年陞南祭酒嵩舉卮酒曰何以別不穀先生從容請  
曰楊繼盛狂言自取死第願相公勿貽主上有殺  
諫臣名嵩避席謝先生退爲司業王公材述其事因  
屬之王曰頃有王生世貞者亦云王果謂嵩以請嵩  
諾而曰昨尹司成嘗及此而私心猶豫未肯決謀諸  
鄢懋卿鄢持不可楊竟論死乃海內稍知王抹楊竟  
莫知出先生也甲寅過家見邑士五科弗舉會文廟  
火乃相邑西廢署徙之捐百金贊厥成自是登名天  
府者橋起五年艤舟玄潭期鄒文莊羅文恭三公及  
郡搢紳士無遠近咸集盡摠所學諸士喜曰得先生

斯學其益昌乎蒞任首革典簿廳宿衛太學諸生欣欣向往遽改北道三茅時鄉士胡生直爲句容學諭挈而登焉浹日慨然語曰吾嘗以新學墮言說鮮躬行邇歸頗有觸於鄉羅二公且見諸士中操節屢屢不撓則又喜曰學在吾郡因重相勗過京口又期武進歸安兩唐公再訂學抵京獨與宗伯歐陽文莊公講磨無虛日已卯上諭嵩邊忠謹文臣二人供奉內直意在先生嵩乃以少宰茅公某及先生名進改少詹事兼侍讀學士掌院事召見上於簾內指曰前行者狀元後者學士也二月特傳御劄令侍郎尹



某代拜祭孔子廢臣以金花鑲帶一與一賀曰 上  
念公深故特晉侍郎秩吏禮二部惟執擇先生曰上  
不以某無狀得與陪末議當出廷推若傳奉非敢承  
命嵩謂沽名揭覆仍以少詹事銜行祭初 莊皇在  
東宮時康妃服未畢生元子 上弗懌乃諭嵩曰禮  
官得無言乎嵩陽爲畫無所之而訊諸朝士朝士皆  
莫敢對先生一人獨曰曷不舉孝慈錄序中不禁民  
間服肉生子語乎嵩用其言以對上釋及 莊皇卽  
位首問先生左右莫言或諷先生自陳白先生哂曰  
吾爲國大體慮也豈計此哉丙辰 上命同閣臣餘  
獻徵錄

姚李公主會試事錄復序有士平居自養始進自擇  
之語時上方修玄每疑羣臣心誹以爲不經乃論  
嵩曰尹臺言自養自擇豈以朕爲此不經之務乎又  
諸臣撰青詞多習爲玄教語而先生止言玄德或逮  
青宮字皆拂上意而嵩得以行間會禮部右侍郎  
缺同寮有欲擠先生以進者用趙文華謀賂廕臣構  
蜚語誣先生忽旨從中出指謫先生曰某受朕簡任  
問安于曹光着罷直供本職曹光者乃上所怒侍御  
史名也詹事府缺先生應推補又有鄢懋卿戚者賄  
得之鄢故傳嵩慰語先生戲之曰君爲都御史乃爲

相門傳語客耶亡何陞南吏部右侍郎明年丁巳京  
察與太宰王公黜陟惟允大司馬譚公少宗伯殷公  
方面朱君薛君爲郎時以與嵩有郤部欲罷之有附  
嵩者部欲庇之先生皆持不可善類獲賴以全會次  
當祝 萬壽節旣至 上降溫旨賜銀綺復念舊直  
之勞出內帑緋羅衣一襲銀十五兩賜焉嵩迎上意  
故欲留北乃竟復南乙未三年滿詣闕進階通議大  
夫贈父祖如其官詔舉選才先生首以王公邦瑞曹  
公邦輔胡公松應薦後皆起爲名臣癸亥陞南禮部  
尚書故事教坊司供應公曹長及臺省諸司先生以

非典裁之是時新政府與先生及趙公皆疇昔同志  
相翼已而以事與二公異議黠者構蜚語間之內寅  
秋先生將以南尚書三年赴考御史王某乘風遂誣  
奏沮其行奉旨爲民然有識者知爲讒中相與憫曰  
清朝乃有是耶而言者亦竟以是取誦 今上元年  
詔起原任不允所辭介行與親族決曰吾感 主上  
知遇出卽還耳未朞再疏乞骸骨遂歸先是嘗割腴  
田三百畝入社備賑復歸乃別建鳳西書院又割田  
四百畝給來學蓋先生早極崇信紫陽躋泰和羅文  
莊公獨至中年因有瘠於大學知本之旨浸與鄒羅

二公語合晚年益以明學術爲首務讀書至老不倦  
爲文槩主六經而體裁一半西京蓋自廷對已然詩  
歌儕建安天寶間無辨四方謁文者充戶所著詩文  
及永新志凡若干卷暇則偕田峻野老談笑或乘筇  
與棹小艇夷猶江畔覩者不知故上卿也已卯秋感  
疾旣革無情容晨興櫛髮瞑目而薨年七十有四

胡直曰吉郡昔繁甲第勛節乃若儒學則與自正  
嘉間蓋踔偉無前矣于時有予邑羅歐兩文莊安成  
鄒文莊吉水羅文恭永豐聃貞襄永新則有大宗伯  
洞山先生相與上下羽翼洙泗人謂吉郡後伊洛而

盛豈不信哉直最晚出恒終以文字謁先生數倒屣  
焉及丙辰乃出門下方文場啓彌封時先生目唯唯  
佇說有直名則爲忻躍揖謝房考者曰得士得士蓋  
先生爲國憐才推轂海內士爲世名卿者不鮮若尹  
秉衡劉顯武士中錚錚者耳先生亟爲引重不遺餘  
力曰世所需也先生豈私樹人哉伯子參軍某又與  
直子締媾因屬狀先生行事不敏狀之又懼文蕪不  
足傳乃著其大者爲傳視狀不能十之二三猶摭之  
耳

資德大夫正治上卿南京禮部尚書曾泉林公

庭機神道碑銘

許孚遠

公諱庭機字利仁別號肖泉林氏當五代時白洛越  
閩家濂江公會大父觀有隱德大父元美由制科刺  
撫州俱累贈南京吏部尚書加贈太子太保工部尚  
書父瀚南京兵部尚書贈太子太保謚文安納母黃  
累贈一品夫人母朱累贈夫人文安公舉九子皆貴  
其仲爲司空少保庭棉其季爲公公幼而敦敏年二  
十舉于鄉三十成進士迺肅皇帝臨軒選入讀中  
秘書授檢討預修大明會典充甲辰春秋同考官已

而遷國子司業遷南京祭酒遷太常卿遷工侍改禮  
侍遷工書改禮書以致政去公平生渾樸簡重澹然  
寡嗜慾其於世之機變智巧非但不爲而若不知雍  
雍肅肅無繁褥之禮無茂葉之言確乎古之君子也  
嘗在史局時伯子嫌亦舉進士官檢討而邸第聯分  
宜相君未嘗一私謂或風之不動及爲司成不數月  
移奉常陽尊而陰抑之出分宜意公視之蔑如也今  
制史官鮮煩以刑名錢穀冰衡之事公兩任司空無  
倦色居留都十有三載以考績三入京師會 穆廟  
初基改秩宗而公從歸途乞骸骨如鴻翔鳳舉不復



可寵狎矣先是振武營軍變戕殺少司空于蔡街人心洶洶銓部舉戶篆屬公公一鎮以靜不爲隄防衆亦寧帖諸郡國轉粟留儲屬邑一不至則不遣若稽滯公敕所司令諸邑毋相及也事竣卽遣四方便之京倉近水者易輸運爭事請託至露積充溢于外而遠者或銖粒不入守空庾公置籌手自探之得偏及諸主吏感泣曰微是吾屬餒死矣內府歲供器皿及織造御服費鉅萬計公稍裁其濫溢中貴人斂手不敢爭工曹之權稅蕪關者多聞其弊滋甚公請擇才望給符檄郡邑廉辦吏爲主進歲增額二萬餘諸

所張弛厝注不動聲色而刊國與民大都類此蓋公  
胃次光潔信理而行無瞻顧拘牽之態其績効反出  
才臣上顧世莫能盡知也公既請老杜門屏跡蕭然  
如寒士時從賓客飲酒賦詩爲歡未幾則伯子燦繼  
公爲宗伯會丁內艱謝不起公奉詔進階資德大夫  
正治上卿父子八座完名全節海內榮焉伯子累疽  
卒公始忽忽不樂仲子煙因亟解組還侍庭闈甫數  
月而公逝 天子賜祭葬如儀沒之日有巨星隕于  
郊光芒燭天或者以爲公之符也公性至孝友年十  
四執文安公喪稱過戚事朱夫人最恭謹與其兄司

理貢士同居二十年門庭穆如撫孤姪無異己子濂  
江祖居煨特營構一字以收族人在宗廟不能婚葬  
者必力爲周卹視人有急若蹈湯火雖涉嫌援之不  
避居未嘗彈射人而亦未嘗責報於人取與然諾一  
本至誠人靡不敬信之者姚江孫文恪嘗曰不技不  
求惟吾友爲然莆田康司空同在史局額其齋居曰  
學林其爲賢者所崇仰如是所著有世翰堂稿藏于  
家金陵許符卿先生論序甚悉大抵其文簡質而該  
涵春容大雅與近世蹊徑絕異詩通盛唐不爲鈞棘  
凌駕而典則雄渾趣自深長讀其詩若文可以想見

其爲人也公生正德丙寅五月初四日卒萬曆辛巳  
六月二十四日享年七十有六配李氏封夫人以孝  
謹慈惠稱先公七年卒賜祭葬子四長熾南京禮部  
尚書謚文恪次煙廣西按察司副使次光官生次拭  
庠生

資政大夫南京禮部尚書璧東林公士章墓誌

銘

于慎行

公姓林氏諱士章字德斐璧東其別號也上世爲福清人出唐九牧之裔中葉有諱安者遷於漳浦之烏石山謂之烏石林氏人文蕃盛稱浦望族大父諱竦考公諱烽皆以公貴贈通議大夫禮部右侍郎兼翰林院侍讀學士大母柳母蔡皆贈淑人蔡淑人之姪公也所居寢室有赤光時見之兒時沉默聰穎志意不羣稍長博聞善記爲文有大雅風嘉靖戊午舉於鄉明年己未升於秩宗廷對賜一甲第三人及第授

翰林院編修當世廟末年詞臣待詔金馬多以供奉  
承恩公獨閉戶下帷沉潛經籍修飾矩度謝絕汎交  
意晏如也壬戌丁內艱歸丙寅除補故官先以宗人  
備計避不入闈至戊辰會試乃爲分考得僞爲多出  
則擢國子監司業大司成豫章王公公之座主也同  
爲國師士侈談之王公務持大體而公佐以嚴密考  
課繩糾無所假貸諸生交心服焉己巳丁外艱歸壬  
申服除以久次起家南京國子監祭酒癸酉改北公  
爲大司成繩矩如前而濟以敦大如王公法崇雅黜  
浮粹然一軌於正兩都人士蒸蒸嚮風矣念大學諸

生卒業而歸格於里選疏令從其省試欲請京兆所  
司檄遣士多成就至今使之甲戌陞禮部右侍郎兼  
翰林院侍讀學士故事從太學轉部少選乃兼北門  
至公兩銜並拜時謂特恩其後率以爲常矣丁丑改  
左兼官如前時上旬御經筵公補講官重修會典爲  
副總裁公雅志獻納既列經緯思以啓沃自效早夜  
訂正講義先期肄習齋宿祇畏如在御前入館考証  
古今損益時宜史臣多受成焉請練朝典明習星曆  
堪輿諸書在部六年朝堂陵廟日有修舉謀盡居間  
諸司之政較如指掌有所主議吏人祇服會相國居

憂廷中諸公連名疏保關西馬公爲大宗伯公及太倉王公爲佐相顧慨然以爲典禮之司倫紀所係當爲名教守之遂不列名却聞而嘆忍未有以發也已而馬公入閣王公以告去而公所與同事多不相謀特以職事調相相遇公落落無所唯阿而與它僚甚昵識者以是重公而言者彌其形似以是貶公卽又無可中也乃摺撫里人細事傳入白簡賴上聖明不遠爲重而太學諸生至羣詬言者之門謂林先生品第何等而銜骨及之不有天道耶時公去國學已數年其風聲所激士猶如此而歸志因決矣頃之陞



南京禮部尚書道中再疏陳情甚力得旨以尚書致仕公故居邑城厭其喧囂乃卜郡郊東北之長橋風氣淑美相而樂之因築小塢其間爲池梁臺榭可以遊觀潮汐往來林木映帶居然一名勝也平生被服朴素儉於儒生亦無聲色之娛客至盤飧相對徜徉山水談說古今有東臯栗里之風氣骨矯健精力過人年幾八十飲啖步履有踰強壯立談纒纒常至夜分蓋澄神習靜佐以調攝非獨得天厚也懸車高臥可二十年士林羨之萬曆庚子卒卒之前期地震三夕人以爲異距生嘉靖甲申春秋七十有七矣守臣

以狀聞 上為悼惜遣藩臣務制臨祠者再中書舍  
人持節治葬皆備物也

姜尚書寶小傳

姜寶字廷善丹陽人同兄家力學及遊荆川唐先生之門所聞益進荆川深期許之會試第三人選入翰林爲庶吉士丁母憂歸服闋除編修時嚴相當國趨附之人昕夕如市廷善獨與同志數人約不時會聚相見各以身心世務相與請求切磋期于不負此日權門惡之出爲四川提學僉事轉河南叅議陞福建提學副使其兩任提學敦尚行誼崇雅黜浮士風文體皆爲之一變在河南處伊庶人事潛消不逞洛人賴之陞南太常少卿改右通政尋轉國子祭酒申飭

監規建復積分之法欲不失國初養士之意期有實  
用會高田素陳延善至是因其駁查魏國公家一事  
遂中以危法聽勘家居十餘年始得白薦起南太常  
卿刑部右侍郎改吏部陞刑部尚書改禮部皆在南  
京以二品考滿賜贈蔭子皆如制尋引年乞骸骨詔  
加太子少保致仕家居置義田立義學申宗法以統  
理族人年八十以壽終

資善大夫南京禮部尚書秦公鳴雷行狀

張鳳翼

公諱鳴雷字子豫別號華峰其先閩人也唐大順間徙台之黃巖東岡再徙臨海遂占籍爲臨海人高祖世珙曾祖宗傳祖彥彬初宗傳未舉子適青島集庭下遺二卵遂生二子其小曰彥彬生五丈夫子長大參文次僉憲禮次樞次樹次侍御武僉憲娶包爲南部郎時生公子公署公夙遭閔凶未滿月而失母甫五齡而喪父當是時大叅無子其配楊岐巖公遂子之公髫年卽遊郡庠未幾而居大叅喪哀能成禮大

參故清白家日益落公省試又報罷時公從兄若鳴  
春爲司寇副郎鳴夏爲青宮中允楊夫人每舉以勗  
公公亦用自淬礪至癸卯會直指使者舒公江督學  
使者孔公天胤後先試士皆首公且遠大期之其秋  
遂領鄉薦甲辰成進士廷試閣臣擬公第七及肅  
皇親閱卷則首擢公次日以例謁分宜分宜曰吾不  
敢貪天工君蓋天子門生也因出御劄示公于是  
知平津不得專美于前云是年卽授翰林院修撰泥  
金至台觀者填道而楊夫人亦用是以自慶無何楊  
夫人卒公奔訃哀毀一如所生不知其非所出也丁

未服闋仍前職是時 肅皇方事玄脩分命史官撰  
玄不次擢在位多染指焉公序當首推特先期請假  
戊申充同修會典官己酉充內書堂教習官庚戌充  
會試同考試官冬充冊封河南徽王副使王有江都  
膠西風不可以禮見公獨以得使職稱辛亥以六品  
考滿進授儒林郎母趙得贈安人壬子順天鄉試京  
兆擬公副主考 肅皇指公名曰此吾所取狀元耶  
其蒙眷注如此丁巳春以九載考滿陞左春坊左諭  
德戊午陞翰林院侍讀學士己未充廷試讀卷官陞  
南京國子監祭酒壬戌陞太常寺卿管國子監事夏

陞禮部右侍郎癸亥進左時 肅皇以顯廟產芝改廟名瑞芝設提點官應給開防有旨照太行山式鑄印局查無太行山式惶懼不知所爲公令取本處文移摹認知爲提點太行山關防卽易以瑞芝廟字覆題稱旨僚屬相顧以爲不可及長陵神道橋圯巨瑱請改建計費十萬餘金中多謀自潤閣臣以陵寢大事未敢可否第擬旨禮工二部相度舉工大司空引物料工匠爲已事而以經始屬公公唯唯率衆量基羣瑣色喜計得矣已而命臺官擇日報曰年月不利興造須二三年後乃可羣瑣喪氣失色無可誰何司



空廉知公授旨臺官也歎曰翰林有人哉由是大宗  
伯每事多咨公其裨益良多類如此乙丑充會試知  
貢舉官公先後兩握文衡二典成均號稱多得士其  
彬彬顯當世者未暇枚舉若冢宰陳公有年宮保梁  
公夢龍司馬王公一鶚太史習公孔教皆其甄拔而  
大學士王公錫爵尤所稱賞以大魁天下期之者也  
其藻鑑類如此丙寅改吏部左侍郎兼翰林院學士  
總校 永樂大典尋推教習庶吉士適言官有承望  
風旨者詆辭侵公公卽亟疏求去朝右多惜之而公  
怡然就道歸構白雲精舍以研書觴詠自娛未嘗通

一讀當路辛未以按院撫臺交薦起家南京禮部右侍郎未行陞本部尚書先是太醫院欽天監四夷館等員每歲屬禮部考校黜陟因之然多請要人關說不如意則媒孽生謗故掌院者多寢閣不行公獨爲鎖部嚴試之試畢卽率僚屬校閱不踰時而案成中外翕服無容訾議是冬以入賀行壬申復任適穆宗登遐典禮叢省臺省畿輔來就質者旁午于道公稽古援今舉疵脩墜時論允協故事南京聞詔後禮卿率百僚上疏慰安一如北京例公言南都聞詔已匝月疏入則兩越月矣安得比輦轂下哭臨時禮力

主罷識者避之明年 今天子踐祚改元其祖考以  
覃恩得贈如其官妣配俱夫人公慨然以知足自命  
上疏乞休未報會省中復有侵公者公求去益力遂  
得賜允然所論公特以影響家宰楊公博覆疏有一  
時偶與時達遂成多口其以直道不合去桀可知矣  
抵家矢口不言其故有問之漫應之曰四時之序成  
功者退蓋不欲人知以江陵故也丙子刺史君約獲  
雋京闈是年冬趙夫人卒以疏請得 旨全給祭葬  
丁丑冬克輿事已卯春叅軍紳以乞得補廐方是時  
公優游家食乘肩輿遊覽山水間若齊雲鴈宕石梁

天姥皆寓目焉癸巳春命駕武林與冢宰張公選勝  
西湖飄然神仙中人也歷長夏猶強健能飛鶴爲卜  
夜歡至是稍作寒熱竟薨逝悲夫公天性孝友以所  
生事所後而又未嘗以所後後所生舉凡祭掃封樹  
之費皆身任之一不以累其族人事三兄篤友于之  
愛至賻寡嫂撫猶子尤致意焉嘗曰孝弟豈必盡如  
臥冰泣竹灼艾同被哉盡心焉耳方刺史之再射進  
士策不中也公馳書趣令調選云士貴奉職盡節官  
下豈必一第爲光榮刺史由是就銓領州遵公命也  
而叅軍亦次第受所應得官蓋身旣退而復以宣力

報國責之後人矣公居鄉樂易不爲城府若無有科  
名爵秩者子孫有過微示顏色如萬石君不苛責也  
至減獲罪慝亦務掩覆之風敦友誼而于我殞之義  
尤篤若經紀何君琰喪其一徵矣嘗肩輿入市有屋  
扉礙車蓋者其人趣下之已而知爲公曰吾以爲他  
宦若秦尚書固可無下渠不我譴也蓋以寬厚孚里  
中有素矣公自處甚約而周人之急則弗靳自奉頗  
儉而宴客必期于豐旣翔貴仍諸生時居而于先塋  
則務飭豐碑饗堂輝映雲日所謂豐約適宜者非耶  
親友里吏譏未嘗輕爲執事筆及遇凶歲則汲汲以

賑濟平糶蠲租請不特出私廩以給待哺作餽粥以  
起溝瘠而已公自少至老奇徵異兆神乩人夢種種  
奇中至石移星隕尤聳觀聽特恐冒左氏好誣之嫌  
不縷述然生爲嶽降沒爲列星公非其人哉訃上聞  
天子爲之嗟悼予祭二壇勅守道大叅吳公獻台  
行事制曰射策大廷本 肅皇之親擢弭彤中禁綜  
昭代之舊章又曰正席兩朝作模多士敦正已率物  
之規收以人事君之效階八座以延登決一辭而勇  
退絲綸之出諒非虛美立朝大節槩乎有徵矣公博  
綜羣籍自黃炎而下涉歷代泊國朝故實鈎引貫穿

舉大包小文宗兩漢詩宗晉唐皆直舒性靈不作鉤  
棘語書法師心而適勁自具意態所著集若干卷行  
於世卒于萬曆癸巳之七月七日距其生戊寅二月  
二日享年七十有六

焦太史編輯國朝獻徵錄卷之三十六終